

[点校本]

中國醫學大成
終集

內科
[十九乙]



中国医学大成终集



〔点校本〕

内科
[十九乙]



赤水玄珠

明·孙一奎 著

原编 曹炳章

赤水玄珠（十六—三十卷）

〔明〕孙一奎 著



赤水玄珠

第十六卷

新安生生子孙一奎 著辑

赤水玄珠第十六卷目录

霍乱门

转筋

中恶客忤门

咳逆

噫门

下气

漏气

嘈杂门

眩晕门

暗门

疸证门

厥门

吐门



霍乱门

霍乱者，挥霍撩乱。其势急暴，有似鬼祟，实非邪也。乃内有所伤，外有所感，阴阳乖隔而成。此前人格论。

《内经》曰：岁土不及，风乃大行，民病飧泄霍乱，体重腹痛，筋骨摇并，盖言木乘土而为病也。夫霍乱者，挥霍撩乱也。其症心腹卒痛，呕吐下痢，发热增寒，头痛眩运，或吐而不泻，或泻而不吐，或吐泻并作。夫邪在上焦，则先心痛而吐；邪在中焦，则先腹痛而泻；邪客上中二焦，则吐泻俱作，甚则转筋，入腹则毙。盖阴阳反戾，清浊相干，阳气暴升，阴气顿坠，阴阳痞隔，上下奔逆。治之惟宜温暖，更详别三因以调之。外因诸风则恶风有汗，伤寒则恶寒无汗，胃湿则重着，伤暑则烦热。又有内因九气所致，郁聚痰饮，痞隔不通，遂致满闷，随其胜复，必作吐利；或诸饮食脍炙，恣餐乳酪，寒浆旨酒，脾胃受伤，遂成吐利。又有转筋者，盖阳明胃主养宗筋，今暴吐下，津液顿忘，宗筋失养，以致挛转，甚则卵缩舌卷，为不治之症。又有干霍乱者，上不得吐，下不得利，壅闭正气，关格阴阳，躁扰喘胀，命在须臾。若湿霍乱，则所伤之物，因吐泻而出，吐泻尽则止，故犹可治。大抵热胜痰郁则闷乱，湿胜饮郁则利下。其治湿霍乱，宜藿香正气散加生姜，不惟可以湿散风湿，抑亦可以调理吐泻。其若伤暑所致者，亦不可遽用香薷沉冷之剂，合先用橘皮、半夏、生姜之类，开散结滞，次则以香薷、五苓温服，散暑解烦；或挟寒而手足厥逆，腹中绞痛，宜以四逆、理中之类温之，亦不可遽用峻补兜涩之剂，则邪愈滋而变症百出。治干霍乱，急以盐汤灌之，令其大吐，庶有可生，切不可与谷食，恐胃中邪物，吐泻不尽，新谷一入，脾不能化，转增危殆。慎之慎之！大概其脉浮洪者易治，若脉微迟，加以气少昏沉不语者，皆难治也。

丹溪曰：内有所积，外有所感，致成吐泻，仍用二陈汤加减。作吐以提其气，切莫与谷食，虽米饮一呷入口即死，必待吐泻尽，过二三时，直至饥甚，方可与稀粥，其脉多伏欲绝。又曰：虽已吐泻不彻，还用吐提其气，或用槿木煎汤吐之。

大法生姜理中汤最好，不渴者可用；如渴者用五苓散，亦可下者。干霍乱最难治，死在须臾，升降不通，邪无从出。当吐提其气，极是良法，世多用盐汤，为内有食伤，外有邪遏，故吐之，吐中就有发散之义。

转筋不住，男子以手挽其阴，女子以手牵其乳近两边，此《千金》妙法也。转筋入腹者死。

《脉诀举要》曰：滑数为呕，代者霍乱，微滑者生，涩数凶断。又曰：滑而不匀，必是吐泻，霍乱之候，脉代勿讶。

《内经》曰：脉伏者霍乱，脉微而涩，或代而散，或隐而伏，或大而虚。脉右关滑，为霍乱吐泻，脉结、促、代皆不可断以死。脉大者生，脉洪者为热，弦者为饮。气口脉弦滑，膈间有宿食留饮。

缩脾饮 解伏热，除烦渴，消暑毒，止吐泻。宜沉冷频服。

草果仁四两 乌梅肉三两 甘草炙，二两半

每服五钱，姜十片，水煎服。

藿香正气散 中湿霍乱吐泻。

苍术 陈皮 半夏 藿香各二钱 甘草炙，一钱

姜五片，枣二枚，水煎服。

桂苓甘露饮 中暑霍乱吐泻，发渴引饮。方见中暑。

不换金正气散 霍乱转筋，呕吐泄泻，头疼。方见疫门。

五苓散 方见暑门。

藿苓汤 外感风寒，内伤饮食，霍乱转筋吐泻。

藿香 厚朴 白术 茯苓各一钱二分 甘草炙，五分 大腹皮 紫苏 白芷 桔梗 半夏 陈皮各一钱 肉桂六分



猪苓 泽泻各一钱半

姜五片，水煎服。

诃子散 霍乱吐利如神，又治心脾冷痛。

诃子 甘草 厚朴 干姜 草果仁 陈皮 良姜 茯苓
神曲 麦芽等分

水煎，入盐服。

二香散 暑湿相搏，霍乱转筋，烦渴闷乱。

藿香 白术 厚朴 陈皮 茯苓 半夏 白扁豆 紫苏
桔梗 白芷 香薷 黄连各一钱 大腹皮 甘草炙，五分
姜五片 葱白三根

水煎服。

加味四君子汤 霍乱转筋吐泻，腹中痛，体重，脉沉而细。

人参 白术 茯苓各二钱 甘草炙 芍药 良姜各一钱
姜三片，枣二枚，水煎服。

通脉四逆汤 霍乱多寒，内冷脉绝。

吴茱萸炒，二两 附子炮，一两 桂心 木通 白芍药
细辛 甘草炙，各五钱 当归三钱

每服七钱，水一钟，酒半钟，姜七片，枣一枚，煎七分，温服。

七气汤 七气郁五脏之间，互相刑克，阴阳不和，挥霍变乱，吐利交作。

半夏五两 厚朴 桂心各三两 白芍药 茯苓各四两
紫苏叶 橘皮各二两 人参一两

每七钱，水一盞半，酒半盞，姜七片，枣一枚，煎温服。

木瓜汤 霍乱吐泻，转筋扰闷。

酸木瓜二两 茴香微炒，二钱半 甘草炙，二钱 吴茱萸

炒，二两

每服五六钱，姜七片，紫苏十叶，水煎服。一方无茴香。

姜附汤 霍乱转筋，手足厥冷，多汗呕逆。方见寒门。

加味香薷饮 伏暑吐利不止，烦闷多渴。

本方加槟榔、黄连，每五钱，水酒各半，煎服。

冷香汤 夏秋伏暑引饮，过食生冷，遂成霍乱。

良姜 附子 甘草 檀香各一钱 干姜炒，一钱 草果一钱半 丁香三分

分二服，水煎，连瓶沉井内，待冷服。

人参散 霍乱体痛，四肢逆冷，服理中、四顺不效者。

人参 白芍 川归炒 良姜各一两 附子 陈皮 桂心 白术各三钱

每五钱，加红枣三枚，水煎服。

活命散 霍乱吐泻不止，面色青黑垂死者。

防风 羌活 独活 干姜 细辛各一分 草豆蔻 肉豆蔻 川芎各五钱 官桂半分 吴茱萸 木瓜各一两

每三钱，浓煎木瓜汤调服。

回生散 霍乱不已，吐利不止，但有一点胃气存，无不效者。

陈皮 藿香叶各五钱

水煎，或为末，热酒调服。

秘方 霍乱吐利转筋神效。

白扁豆叶一根，研取汁一碗，入米醋同服，立瘥。

加减理中汤 霍乱呕吐。

白术 人参 干姜各三钱 甘草炙，一钱

水煎服。



若为寒气、湿气所干者，加附子一钱，名附子理中汤。若霍乱吐泻，加陈皮、青皮各一钱，名治中汤。若干霍乱，心腹作痛，先以盐汤少许，频服，候吐出令透，即进此药。若呕吐者，加丁香、半夏各一钱，姜十片同煎。泄泻者，加橘红、茯苓各一钱，名补中汤。溏泻不已，于补中汤内加附子二钱，不喜饮食，及米谷不化，再加砂仁一钱。霍乱吐下，心腹作痛，手足逆冷，于本方内去白术加熟附子，名为四顺汤。伤寒结胸，先以桔梗、枳壳等分，煎服；不效者，及诸吐利后胸痞欲绝，心膈高起胀痛，手不可近者，加枳实、茯苓各一钱，名枳实理中汤。若渴者，再于枳实理中汤内加瓜蒌根一钱。霍乱转筋者，理中汤内加火煨石膏一钱。若脐上筑者，乃肾间动气也，去术加官桂一钱半，肾恶燥，去术恐作奔豚也，故加桂取辛以润之。若悸者，加茯苓一钱；渴欲饮水者，加白术五分。腹满者，去白术加附子一钱。若寒者，再加干姜一钱。饮酒过多，及啖炮炙热物，发为鼻衄者，加川芎一钱。伤胃吐血，以此药能理中脘，分利阴阳，安定血脉，只用本方。

《三因》白术散 中暑呕吐眩运，及大病后调理失宜，劳复，及脾胃虚损，面色青黄，饮食不思，口吐酸水，滑泄腹鸣，饮食所伤，霍乱吐泻并宜服之。

白芷 甘草炙 青皮 白茯苓 桔梗 香附子 山药各
三两 干姜五钱 白术 陈皮各一两

每一两，姜三片，枣一枚，木瓜一片，紫苏三叶，水煎服。若吐泻加白梅煎。喘加桑白皮、杏仁。伤寒劳复加薄荷。膈气加木通，入射香少许。中暑呕逆加香薷。霍乱加藿香。产后泄泻加荆芥。气厥加盐，煎服。

调中白术散 大病后吐泻烦渴霍乱虚损，气弱及酒毒呕哕。

白术 茯苓 人参各五钱 藿香五钱 甘草炙，一两五钱
木香一钱 葛根

为末，白汤调服二钱。烦渴加滑石二两，甚者加姜汁。

经验方人参散 止吐逆及泻后烦渴，常服调中和气。

人参 茯苓各五钱 葛根一两 藿香 木香 甘草炙，各一钱半

分三帖，水煎服。泻后渴甚者，加滑石一钱。

止渴汤 霍乱烦渴。

甘草炙 人参 麦冬 茯苓 桔梗 瓜蒌根 泽泻 葛根各五钱

右末，蜜汤调下二钱。

姜盐饮 霍乱欲吐不吐，欲泻不泻。

盐一两 生姜五钱，捣碎

同炒令色变，以水一碗，煎热，温服，甚者，加童便一盞。

蓼汤 霍乱转筋不止。

蓼一大握，水煎汤薰洗，或以帛蘸汤慰患处。

一方 每遇转筋时，即以盐揩擦痛处，三五十匝，即虽皮破亦不妨，可以断根。

灸法 霍乱已死，腹中尚暖，犹未绝气者。

用盐纳脐中令满，大艾炷灸三五七壮，苏。

麦冬汤 霍乱已愈，烦热多渴，小水不利。

麦门冬 茯苓 半夏 陈皮 白术各一钱半 人参 小麦 甘草各一钱

生姜五片，乌梅半个，煎服。

青金丹 霍乱吐泻不止，及转筋诸药不效者。

硫黄一两 水银八钱

右二味，铤子内炒，柳木篦子不住手搅匀，更以柳枝蘸冷醋频洒，候结如铁色，即成青金丹，乃刮下再研如粉，留小半为散，余以



粽子尖三个，醋约半盏，研，稀稠得所，成膏，丸如鸡豆子大，朱砂为衣。每服一丸，煎丁香汤磨化下，热服。如作散服，以丁香汤调下一钱，伤寒阴阳乘伏，用龙脑冷水磨下，一日二三服。

海藏云：吐泻转筋，身热脉长，阳明本病也。宜和中四君子汤、平胃散、建中汤。每一两，姜五片，水煎服。如吐泻转筋，自汗脉浮者，四君子汤加桂五钱。吐泻转筋胁下痛，脉弦者，宜建中加木瓜柴胡汤，平胃散加木瓜五钱亦可也。

建中木瓜柴胡汤

桂枝二两半 芍药三两 甘草一两 胶饴糖半斤 生姜一两半 大枣六枚 木瓜五钱 柴胡五钱

每一两，水煎，临服加饴糖两匙。吐泻后小便不通，胸中实痛者，四君子汤加大黄一两。吐泻腹中痛，转筋，体重，脉沉而细者，宜四君子加高良姜、白芍药，四君子四味各一两，芍药、良姜各五钱，同前煎法服。吐泻霍乱，四肢拘急，脉沉而迟者，宜四君子汤加姜附厚朴汤，四君子四味各一两，生姜、附子、厚朴炮制，各三钱，同前煎服。吐泻转筋，四肢厥冷，服微缓者，宜建中加附子当归汤。

桂枝一两 当归二钱 芍药二两 粉草五钱 饴糖半升 生姜一两 附子炮，三钱 大枣六枚

同前煎服。吐后转筋，木瓜一味煎服良。

转筋

寻常转筋，四时皆有，不因霍乱而发者，其发多于睡中，或伸欠而作，丹溪谓此多属血热。以四物汤加苍术、红花、酒芩、南星，水煎服。

有筋转于足大指，转上至大腿近腰结了，乃因奉养过厚，饮冷感寒而作，寒遏其热，寒主收引劲急，故筋转而疼也。前方加姜汁，临时服之。

足太阳之下，血气皆少，则善转筋，踵下痛。

丹溪曰：转筋遍身入肚不忍者，作极咸盐汤于槽中，暖浸之。矾汤亦妙，蓼汤亦好。

仲景云：转筋之为病，其臂脚直，脉上下行微弦。转筋入腹者，鸡屎白散主之。

鸡屎白炒，为末，取方寸七，以水六合，和温服。

《圣惠方》肝虚转筋，用赤蓼茎叶切作三合，水一盞，酒三合，煎四合，分二服。

孙尚药 脚转筋疼痛挛急。

松节二两，剉如米粒，乳香一钱，以瓦器内慢火炒令焦，只留一分，出火毒，为末，每一钱至二钱，热木瓜酒调下。但是筋病疼痛皆妙，不独转筋而已。

《外台》治转筋，取旧绵以酽醋浸甑中蒸，及热，用绵裹患脚上，冷则易，勿伤皮，以瘥为止。

秘方 脚转筋无时，甚好。

雄猪阴茎一条，全者，薄切，香油煎热，细嚼，盐酒送下，空心服，连进三朝奇验。



㊟ 中恶客忤门

中恶客忤者，无故忽然而病倒者是也，多受于道途及早晚门外忽得之。卒受非节之气，令人心腹绞痛，胀满叫唤，气冲心胸，不急治则死。磨好具烟墨一盏，热汤解服之，又有盐汤探吐亦好。卒死鬼击，或先病，因睡卧间忽然而绝，皆是中恶之候。若脉气应指，心头仍暖者，捣石菖蒲灌之立苏，如口噤，须灌从鼻入。

中恶暴死。

石菖蒲为末，每用五分，安舌底，又吹入两耳及鼻中，则苏。

中恶入心须死。

阿魏末，盐酒调下一钱半，连进二服效。

中恶吐血。

生桔梗取汁，每服一钟，日三。无生者，以干者为末，仍以桔梗汤调下。

中恶客忤。

苏合香丸姜汤调下，妙。

咳逆门

《内经》曰：岁金太过咳逆，金郁之发咳逆，少阴二气咳逆。古谓之呃逆，气上逆作声之名也。《经》曰：诸逆冲上，皆属于火，是心火刑于肺金也。《易老》曰：咳逆者，火热奔急上行，而肺金不纳。何其当哉？俗以为哕者非，盖哕者出声也。哕出其气，哕声尽，然后呼也。出入呼吸，大有不同。况哕者本于胃，咳逆者本于肺，又岂可例论哉？然是症或由水渍于肺而心痞，或喜笑过多而气噎，或咽饮错喉而气呛，或急食干物而气塞，皆令作咳逆之声，连续不绝，俗谓吃忒是也。人或以纸捻取鼻嚏而止，或冤以恣贼，因恐而止，或鼻热闻食香调气而止，皆抑之骇之而使气下也。又有胃气寒而呃，元礼戴氏以杂病发呃者皆属寒，惟有伤寒发呃属热。盖由阳明内实，过经失下，清浊不得升降，以致气不宜通而作。或又有饮食填塞胸中，而气不得升降者；或有痰闭于上，火起于下，而气不得伸越者；又有吐利后胃虚膈热而作呃者；又有气血虚作呃者。不可以不辨也。

伤寒阳症咳逆者，盖由阴消将尽，阳火暴甚，直冲而上，出于胃，入于肺而作声，所以东垣用凉药以泻热降火。其阴症咳逆者，盖以阴气先消，阳火将竭，浮于胸中，亦欲散也。故反用丁香、干姜之属，以养胃中阳气，胃气一和，阳生则阴长也。

丹溪云：伤寒发呃亦有四症不同。有中气不足，脉虚微，气不相续而发呃者，宜补中益气汤加生脉散，加黄柏以降虚火，或少加附子服之立愈。有阳明内实失下而发呃，宜大承气汤下之。有渴而饮水太过，成水结胸而发呃者，宜小陷胸汤，或小青龙汤去麻黄加附子，治水寒相搏发呃者妙。有传经伤寒热症，误用姜、桂热药助起火邪，痰火相搏而为呃者，宜用黄连解毒白虎汤，及竹沥之类。大儿



食呃，便秘者，大承气下之；便软者，泻心汤主之。久病虚者，见此症最危。《心法》云：咳逆有痰、有气虚、有阴火，视其有余不足治之。其详在《格致余论》。不足者，人参白虎下大补丸。有余并有痰者，吐之，人参、芦之类。痰碍气而吃逆者，用蜜水吐，此乃燥痰不能出。痰者，以陈皮、半夏。气虚，人参、白术。阴火，黄连、黄柏、滑石。咳逆自痢者，活石、甘草、炒黄柏、白芍药、人参、白术、陈皮加竹沥服。

戴元礼云：咳逆因痰与热，及胃火者极多。

橘皮竹茹汤 胃热多渴，哕呃不进饮食。

赤茯苓 陈皮 枇杷叶 麦门冬 竹茹 半夏各二钱五分 甘草炙 人参一钱二分

分二服，每服姜七片，水煎。一方只用人参、陈皮、甘草、竹茹。

小柴胡汤 加姜三片，柿蒂三枚，轻服。治同上。

橘皮干姜汤 胃寒咳逆。

陈皮 通草 干姜 桂心 人参 甘草各等分

水煎。

丁香柿蒂散 病后胃中虚寒，咳逆至八九声相连。收气不回者，难治。

人参 茯苓 陈皮 半夏 良姜炒 丁香 柿蒂各一两 生姜一两半 甘草五钱

水煎服，调苏合香丸服尤妙。一方只用良姜、丁香、柿蒂、甘草，四味水煎服。

柿蒂汤 胸满咳逆不止。

柿蒂 丁香各三钱

一方加人参、姜五片，水煎服。

皂荚半夏汤 治咳逆欲死。